

四庫全書

集部

欽定四庫全書

山谷年譜卷二十八

宋 黃芻 撰

建中靖國元年辛巳

先生是歲正月解舟江安

先生有書和晁無咎詩與斌老跋云元符三年十二月余嘗發戎州於百忙中為斌老書此卷建中靖國元年正月遣小使持此來追余於江

安縣云云文有瀘州中填葛氏竹林留題云江南黃庭堅自楚道蒙恩放還元符三年十月道出江安江安宰石信道以親親見留卒歲及書瀘州開福寺彌勒殿銘跋云建中靖國元年正月乙亥清輝閣前舟中書及有題所書魏鄭公砥柱銘後云建中靖國元年正月庚寅繫舟王市山谷老人燭下書

正月晦與合江令尹白宗愈原道汎安樂溪

見游瀘州合江縣安樂山行記

二月辛酉與太守高仲本游西山南浦庚寅游三游洞

見南浦行記并題三游洞石刻

三月至峽準告復奉議郎權知舒州

四月至荆南又準尚書省劄子已降告命除吏部員外郎乘遞馬發來赴闕

先生有書東坡思舊賦題跋云建中靖國元年

四月乙未早發峽州舟中書及題東坡字云建
中靖國元年五月乙巳觀於沙市舟中先生既
至荆南以病癰瘍初愈再具辭免乞江湖一合
入差遣遂寓家荆南有跋匹紙云十月戊子荆
州沙市舟中

六月二十三日準尚書省劄子奉聖旨不許辭免已
除吏部之命

見辭免狀載文集先生於是再具辭免并述前

狀嘗乞太平州無為軍一處及以亡弟哀惱伏
暑傷冷併作羸疾乞除江湖合入差遣一向遂
留荆南待命以至度歲

元師自榮州來追送余於瀘之江安綿水驛因復用
舊所賦此君軒詩韻贈之并簡元師從弟周彥公
按此詩跋云余舊得東坡所作醉翁操善本嘗
對元道之元欣然曰往歲從成都通判陳君頎
得其譜遂促琴彈之詞與聲色相得也蜀人由

是有醉翁操然詞中之微旨弦外之餘韻俗指
塵耳豈易得之建中靖國元年正月辛未江安
水次偶住書此此篇元載別集

萬州太守高仲本宿約遊岑公洞而夜雨連明戲作
二首

萬州之下巖唐末有劉道者定州無極人聞道於雲
居膺禪師為開巖第一祖法號道微自鑿石龕曰
死便藏龕中不用日時門人奉其命二百年來游

者題詩不可勝讀莫能起此開巖者故予作此二篇表見之其一用楊子安韻其一用王定國韻

又戲題下巖

萬州下巖

此篇即用楊子安韻載文集五卷今附於此

戲題巫山縣用杜子美韻

詩中有江陵換袂衣之句

和王觀復洪駒父謁陳無已長句

按蜀本詩集注云王蕃字觀復沂公之裔官閬
中時多以書尺至戎州從山谷問學至是自京
師改官復入蜀會山谷於荊州時山谷病癰初
愈答觀復簡云卧病二十餘日幾死者數矣忽
奉手誨歡喜如從天上落也陳無已元符三年
冬為祕書省正字故此詩有集賢學士見一角
之語

跋子瞻和陶詩

先生有真蹟石刻題云建中靖國元年四月在
荊州承天寺觀此詩卷歎息彌日作小詩題其
後又子瞻謫嶺南彭澤千載人作淵明千載人
氣味乃相似作風味乃相似蜀本載之崇寧元
年今移附於此

次韻聞善

聞善名友聞居荆南蓋先生族伯父晦甫侍御
之子

次韻益修四弟

益修名友益聞善之弟

以峽州酒遺益修繼前韻

謝益修四弟送石屏

顏徒貧樂二首

顏徒名友顏益修之弟

次韻答黃與迪

次前韻謝與迪惠作竹五幅

戲答王觀復酴醿菊二首

戲答王子子送凌風扇二首

四篇以時序為次子子時僑寓荊州

謝王子子送橄欖

以椰子小冠送子子

呈楊康國

又戲呈康國

二詩皆言黃柑未熟

次韻馬荊州

詩中有茱糝菊英同送秋之句

和中玉使君晚秋開天寧節道場

徽廟以十月十日誕降為天寧節開啓蓋九月

十日

入窮巷謁李材叟翹叟戲贈兼簡田子平三首

詩中有紫冠黃鈿網絲窠之句

戲簡朱公武劉邦直田子平五首

朱劉田皆荆南人詩有葵莧秋之句

戲呈田子平六言

此篇元載外集詩中有荊州衣冠千戶厚意獨
有田郎之句

戲贈米元章二首

按蜀本詩集注云米芾字元章為發運司屬官
在江淮間建中靖國之秋東坡北還常有手帖
與之此詩似亦當時所作蓋詩中有滄江書畫

船之句今附見

次韻錢德循鹿苑灘艤舟有作

詩中有已聽荊州漁鼓鳴之句此篇元載別集
病起荊江亭即事十首

詩中有大聖天子初元年及西風吹淚古藤州
之句又是歲七月東坡卒於常州而此詩猶未
及之當是初秋所作

荊州即事藥名詩八首

此八篇元載外集

以古銅壺送王觀復

鄒松滋寄苦竹泉榘麴蓮子湯三首

松滋隸荆南詩中有新收千百秋蓮的之句

次韻答馬中玉三首

次韻中玉梅三首

次韻中玉水仙花二首

王克道送水仙花五十枝欣然會心為之作詠

吳君送水仙花并二大本

劉邦直送早梅水仙花三首

劉邦直送水仙花

謝檀敦信送柑子

贈李輔聖

和高仲本喜相見

詩中有雪滿荊州喜再逢之句

戲詠暖足餅二首

以時序為次

戲呈聞善二兄

謝答聞善二兄九絕句

留乾道之未隨侍先人官荊州得見族伯祖
晦甫侍御位族伯父仲賁名楫仲賁嘗言先
生既與侍御位諸子為昆弟視聞善為兄聞
善酹酒山谷詩篇中多形勸戒聞善每飲酒
至醉往往坐不肯起一夕赴姻家柳氏夜集

既散聞善復坐不歸柳氏亦告酒盡但有一
甕酒未堪筭聞善聞之喜甚亟造其廂內直
抵甕下聞善病酒疥尋常旁坐者亦病之聞
善即以兩手轆甕中柳氏子弟中真有意欲
毆之者坐客勸曰酒已壞矣曷若使之盡歡
可乎柳氏且怒且笑不免取而酌之聞善大
喜狂歌盡醉而去故先生詩中有疥手轆甕
庸何傷及柳家兄弟太迫窄之句蓋紀一時

之實耳又先生有書贈聞善飲酒詩後云往
時族中多釐於酒二十年間兩還故里見子
弟皆恂恂愛讓醉而溫恭中竊自喜黃氏諸
子之遺慶深長諸少年尚承其風澤時有興
發者即因子立乞書書九詩可與族中觀知
酒之利病如此

戲呈聞善

題子瞻畫竹石

按蜀本詩集注云舊題云題全天粹所收子瞻
竹石天粹名壁山谷在荊州時有與天粹帖又
有字說云全壁長林人長林屬荊門軍此詩當
附見於荊州詩中

次韻向和卿松滋縣與鄒天錫夜語南極亭二首
詩中有提壺及思歸樂之句

木龜亭留題

題羅公山古栢菴二首

詩中有會向天階乞衰晚之句二詩未詳地名
恐是蜀中或湖外所作今附於此並元載別集

山谷年譜卷二十八

欽定四庫全書

山谷年譜卷二十九

宋 黃芻 撰

崇寧元年壬午

先生是歲在荆南

先生有正月與子由書云三兩日即拏舟下巴陵出陸至雙井六日耳遂由雙井往萍鄉省伯氏元明

正月二十三日發荊州二十六日至巴陵

先生與天民嗣文二弟書云老夫正月二十三日發荊州又有手書雨中登岳陽樓望君山二詩跋云崇寧之元正月二十三夜發荊州二十六日至巴陵數日陰雨不可出二月朔旦獨上岳陽樓太守楊器之監郡黃彥并來率同游君山行二十里螺蚌中乃至見住持僧年八十跛曳而出登其絕頂環望積水數百里實壯觀也

有野馬二十餘羣游平澤中猿猴輩出上下松楠間景氣甚野

二月初六日至通城

亦具所與天民嗣文書老夫今日至通城之法興道中幸健即相見悲喜相半今遣王清走報黃龍脩上各不過住二日耳書末題二月初六日

三月己卯寓萬載廣慧道場

先生有跋陳甘休所收舊字云崇寧元年三月
己卯自分寧來宿萬載之廣慧道場按長厯己
卯蓋二十四日

四月乙酉到萍鄉

按萍鄉壁記云杭荆江畧洞庭涉修水經七十
二渡出萬載宜春來省伯氏於萍鄉來以崇寧
元年四月乙酉去以是月之己亥乙酉蓋四月
朔又己丑飯於萍鄉護法院見書船子和尚歌

後

是月丁未登吳叔元秀江亭

亭在新喻有題名石刻云朝奉郎新當涂假守
黃庭堅崇寧元年四月丁未來訪叔元晚登秀
江亭澄波古木使人得意於塵垢之外蓋人間
景幽兩奇絕耳

五月一日過筠州

先生有與七兄長官書云庭堅到臨江及筠以

親舊皆留兩日筠亦以張九微凍著不欲拖拽
上道幸夜來已安今早遂行書末題五月初一
日又批云初一日五鼓元字又有題胡氏所憩
亭壁云山谷老人稅駕而飯嘉作亭之意為書
此榜崇寧之元五月之吉實乙卯黃庭堅云
是月到江州十七日猶在展畫亭

按西林寺題壁云黃庭堅弟叔豹姪柄子相及
朱章劉義仲李彭同來瞻永禪師塑像觀碑陰

顏魯公題字愛碧甃流泉凌厲暑氣裒回不能
去崇寧元年五月癸亥及題太平觀壁云黃庭
堅自江西來會王宰朱章道士湯居善周虛已
於此堂觀四山急雨草木皆成聲崇寧元年五
月甲子時發東林又有雲巖海公院草書其末
題五月十七日江州展畫亭及息心銘跋云崇
寧元年五月十七日江州展畫亭又有草書跋
云崇寧元年五月十七日湓浦展畫亭飯後為

道淳上座作草以滌餘困其暫留江州蓋待嗣
文節推弟船家同赴任具先生與洪龜父書云
四十及新婦在荆南已遣十六節推弟往取船
來會江州矣嗣文名叔豹第十六蓋給事長子
二十日過湖口

見先生追和東坡壺中九華詩注

是月繫舟於大雲倉之達觀臺下

先生有手書奉題伯時所作陽關圖跋云元祐

初作此詩題伯時所作陽關圖崇寧元年五月
見此草於趙升叔家殊妙於定本升叔伯時壻
也時俱繫舟於大雲倉之達觀臺下

六月初九日領太平州事九日而罷

按國史崇寧元年五月庚午司馬光而下四十
餘人貶奪降黜有差孔平仲畢仲游徐常黃庭
堅晁補之韓岐王鞏劉當時常安民黃隱張保
源並送吏部與合入差遣仍令吏部依條差注

施行詔在乙亥先生有與徐師川書云老舅六月九日領太平事十七日奉朝旨送吏部即日解船至江口以嗣文同行遂為遠別亦大風不可行留連方欲決去會駒父奉其大母來又為之留七日閏月十一日分手亦衝東風至蕪湖矣又按于湖居士張公孝祥作高侍郎夫人王氏墓誌載侍郎諱衛及與元祐諸公游嘉言懿行太夫人悉能記之侍郎為太平州判官攝州

事山谷來為守謫久貧甚既入境矣復坐黨事
先侍郎得堂帖不以告迎候如禮山谷既視印
已乃知之侍郎為治歸裘甚飭備過於久所事
觀此則冷齋夜話所稱徐師川言予於東坡山
谷瑩中三君子俱知敬畏指其疵瑕予能笑之
謂東坡欲學長生瑩中對日者談命山谷赴官
姑孰聞罷而俯就其說之妄益可見矣

七月甲午復繫舟達觀臺下

先生有跋草書後云崇寧元年七月甲午繫舟
達觀臺下待舒城家問朝涼戲作此卷

八月復至江州

先生罷太平後喪回於江州將復過荆南謀居
然竟留於鄂州亦見徐師川書云將家到荆南
謀居云云詳見後注又先生有跋自書東坡乳
泉賦云紫極宮道士胡洞微明之少入道於廬
山康王觀嘗從容趨事余伯祖父寶之寶之人

豪也少名茂先故往時江淮之間詩云江南黃
茂先江北段少連明之猶能道其言論風旨故
其見余喜甚相從忽忘日暮也東坡公所作乳
泉賦數百年之文章也明之又好東坡故書遺
之可深藏以待識者崇寧元年八月己未泊舟
琵琶亭西書又先生有跋登江州百花亭詩云
崇寧元年八月壬戌來集斯亭己未蓋初七日

九月至鄂州

先生有跋元祐間與三姪太君帖云崇寧元年
九月甲申繫舟樊口庭堅題甲申蓋十二日

次韻答高子勉十首

高荷字子勉荊州人而此詩有春從細草回之
句是春初所作

贈高子勉四首

再用前韻贈子勉四首

詩中有鳥語花中管弦之句春稍動矣

荆南簽判向和卿用予六言見惠次韻奉酬四首蟻

蝶圖

謝人送栗鼠畫維摩二首

戲答荊州王充道烹茶四首

已上當是未離荊州所作

雨中登岳陽樓望君山二首

此詩有跋已具前注

自巴陵略平江臨湘入通城無日不雨至黃龍奉謁

清禪師繼而晚晴邂逅禪客戴道純款語作長句呈道純

按蜀本詩集注云巴陵平江臨湘皆屬岳州通城屬鄂州黃龍山在分寧李彤季敵書豫章集後云先生自巴陵取道通城入黃龍山為清禪師徧閱南昌集自有去取即此詩也

觀化詩十五首

并序

此詩元載外集其間詩中有流落來從綿上州

之句且多言鄉里景物故附於此

題徐氏書記

徐氏即徐禧德占

題胡逸老致虛菴

題蓮花寺

衝雨向萬載道中得逍遙觀遂託宿戲題

此詩往萍鄉時所作萬載屬袁州

題竹尊者軒

送密老住五峯

按蜀本詩集注云山谷有為密公作草書跋尾云元年三月壬午旅寓宜春之開元飯崇勝密公之堂即此僧也壬午月二十七日宜春屬袁州

新喻道中寄元明用觴字韻

此詩自萍鄉歸涂所作新喻屬臨江軍

次韻子瞻和太白潯陽紫極宮感秋詩韻

追懷子瞻太白

瓊芝軒

龜殼軒

秋聲軒 三篇皆紫極官所作

濂溪詩

按濂溪先生故居去江州城不數里溪在故居

今附於此見載文集

戲效禪月作遠公詠

按蜀本詩集注云遠公道場即今江州廬山東
林寺是歲八月庚申山谷有東林題名此詩當
是同時所作庚申蓋初八日

湖口人李正臣蓄異石九峯東坡先生名曰壺中九
華并為作詩後八年自海外歸過湖口石已為好
事者所取乃和前篇以為笑實建中靖國元年四
月十六日明年當崇寧之元五月二十日庭堅繫
舟湖口李正臣持此詩來石既不可復見東坡亦

下世矣感歎不足因次前韻

書郭功甫家屏上東坡所作竹

按家藏先生此詩真蹟題云次韻東坡先生屏
間墨竹止此六句但草不春作草偃風一暮終
玉局作一壺瓊房第幾間作琳房并有功甫跋
語云東坡作於予家漆屏之上觀魯直之詩可
以見其髣髴矣功甫蓋太平州人

太平州作二首

按家藏先生真蹟前一首題云戲作觀舞絕句
奉呈功甫兄又片片梨花雨作細點梨花雨

三篇元載外集

罷姑孰寄元明用觴字韻

武昌松風閣

按蜀本詩集注云此詩經涂所作今尺牘中有
跋與李德叟書云崇寧元年九月甲申繫舟樊
口題時張文潛再謫黃州猶未至也故詩有張

侯何時到眼前之句今按國史崇寧元年七月
庚戌主管亳州明道宮張耒責授房州別駕黃
州安置而文潛謝表云已於九月三日到黃州
公參訖

次韻文潛

和文潛舟中所題

按蜀本詩集注云二詩並次前篇時文潛已到
黃山谷自鄂往見之前詩中有風雪牖戶勤塞

向之句蓋冬深所作

題君子泉

泉在黃州

宿黃州觀音院鐘樓上

按蜀本詩集注云元在次韻文潛後詩有潘何之語今遷於此為後詩張本

謝何十三送蟹

按蜀本詩集注云何十三當是何頡之斯舉或

其弟兄韻之蓋黃州人集中又有三詩見於脩
水集者亦附見其一又借答送蟹韻并戲小何
云草泥本自行郭索玉人為開桃李顏恐似曹
瞞說雞肋不比東阿舉肉山其二代二螯解嘲
云仙儒昔日卷龜殼蛤蜊自可洗愁顏不比二
螯風味好那堪把酒對西山其三又借前韻見
意云望潮瘦惡無永味海鏡纖毫只強顏想見
霜臍當大嚼夢回雪壓摩圍山今豫章集皆不

載今併附見何十三名覲

次韻文潛立春日三絕句

再次前韻

按蜀本詩集注云按長厯是歲十二月二十一日立春明年春時山谷已歸鄂故詩中有已發黃州首更回之句

崇寧二年癸未

先生是歲留鄂州

先生有四月二十二日與張叔和通判書云庭
堅罷太平即寓鄂渚會范德孺謫來即謀居漢
陽已而安厚卿來遂營居九江將登舟矣德孺
以散官安置衆議以為自下礪責降充宮觀人
不得同州指揮遂定居耳按國史正月己酉范
純粹常州別駕鄂州安置是時先生已管句洪
州玉隆宮

十一月有宜州謫命

按國史先生本傳庭堅在河北與趙挺之有小
怨挺之執政轉運判官陳舉承風旨上其荆南
所作承天塔記指為幸災復除名羈宜州

當昔聞荊州族伯父仲賁嘗言為兒童時乃
識先生脩聞諸父聞善益脩諒正話及目擊
當時之事筆記甚詳仲賁有跋承天塔記云
先生初自蜀出峽留荊州待辭免乞郡之命
與府帥馬城忠玉相從歡甚閩人陳舉自臺

察出為轉運判官先生未嘗與之交也承天
寺僧智珠造七級浮圖乞記於先生一日記
成忠玉飯諸部使者於浮圖下環觀先生書
碑先生於碑尾但云作記者朝奉郎新知舒
州事豫章黃庭堅立石者承議郎知府事在
平馬城而已舉與轉運判官李植提舉常平
林虞相顧遽請於前曰某等願記名不朽可
乎先生不答舉由此憾之舉知先生昔在河

北與趙挺之有怨挺之執政遂以墨本走介
戲於朝廷謂幸災謗國先生遂除名羈置宜
州忠玉亦以辰州徭賊寇邊監察御史席震
繼而劾之奪官羈置海州遂俱歿於貶所嗚
呼其亦不幸甚矣其後不踰年挺之去位而
舉因指青蟲為龍物奏為祥瑞遂坐欺罔誠
足以為小人陷君子之戒今併附見

十二月十九日夜中發鄂渚曉泊漢陽親舊追送

按蜀本詩集注云是歲山谷在鄂州既而謫宜
州十二月十九日發鄂渚至岳陽作歲而所議
乙丑越洞庭丙寅渡青草之句謂是明年二月
二十一二日今以先生跋苦寒吟攷之其跋云
開封張德潤號為有急難之義予晚識之於長
沙名不虛得也泊船驛步門與德潤官廨相近
時時相過奔走予所關如有人挽其前推其後
也它日持此卷來乞書會舟子作歲除未能行

舟中無它緣偶得意書盡崇寧二年十二月晦
此真蹟見藏晉陵尤氏既歲暮到長沙則過洞
庭青草當在此月二十以後不應在岳陽卒歲
若以國史考之十二月丙寅為二十一日雖注
引先生與人帖云庭堅治行已有緒既嫁女別
無一事移舟漢陽留數日待親戚之在旁近耳
此帖不注月日今祕館中有先生雜文內有此
書乃是與文舉書其書尾云十一月二十七日

自二十七日推之恐鄂州必無兩旬之留亦或
十九日傳寫之誤或是初九日亦未可知先生
舟行往往不舍晝夜此既夜發鄂渚而先離荆
州亦是二十三夜已載手書君山詩跋兼先生
次年有與李樂道書云十一月末不肖蒙恩活
之宜州即發船過漢陽軍或是先欲留漢陽數
日走到長沙況當時事勢不應聞命之後留兩
月度歲又先生有禮思大師題名乃崇寧三年

正月甲辰甲辰為正月晦思大師道場在衡山
福巖又先生有書法輪古碑後跋云崇寧三年
二月丙寅脩水黃庭堅書法輪在南嶽見有石
刻詳見後注則非二月丙寅過青草湖矣

崇寧二年正月己丑夢東坡先生於寒溪西山之間
予誦寄元明觴字韻詩數篇東坡笑曰公詩更進
於曩時因和韻一篇語意清奇予擊節賞歎東坡
亦自喜於九曲嶺道中連誦數過遂得之

己丑蓋九日

病來十日不舉酒二首

詩中有回施青春與後生之句當是春時所作

題小景扇

鄂州南樓書事四首

詩中有我亦來追五月涼之句山谷在鄂州作

夏惟此年耳

南樓畫閣觀方公悅二小詩戲次韻

庭堅以去歲九月至鄂州登南樓歎其制作之美成
長句久欲寄遠因循至今書呈公悅

養鬪雞

和涼軒二首

以時序為次詩有西風之語

題默軒和遵老

題楊道人默軒

此篇元載外集

次韻文安國記夢

寄賀方回

鄂州節推陳榮緒惠示泂檄崇陽道中六詩余老嬾
不能追韻輒自取韻奉和

頭陀寺

道中聞松聲

中秋山行懷子興節判

再登蓮落嶺懷君澤知錄

崇陽道中

晚發咸寧行松徑至蘆子

陳榮緒惠示之字韻詩推獎過實非所敢當輒次前
韻三首

山谷年譜卷二十九

欽定四庫全書

山谷年譜卷三十

宋 黃芻 撰

崇寧二年癸未

德孺五丈和之字詩韻難而愈工輒復和成可發一笑

按蜀本詩集注云按實錄崇寧元年十月管句
南京鴻慶宮范純粹鄂州居住二年又責常州

別駕鄂州安置

次韻德孺五丈新居病起

次韻德孺五丈感興二首

次韻德孺五丈惠貺秋字之句

范德孺需筆裛諸工佳者共成十枝分送

此篇元載別集

求范子默染鴉青紙二首

子默德孺之子

謝榮緒惠貺鮮鯽

謝榮緒割獐見貽二首

吳執中有兩鵝為余烹之戲贈

秋冬之間鄂渚絕市無蟹今日偶得數枚吐沫相濡
乃可憫笑戲成小詩三首

以題中時序為次

甯子興追和予岳陽樓詩復次韻二首

和甯子興白鹿寺

謝人惠猫兒頭筍

詩中有鸚鵡洲前人未知之句蓋謂未離鄂州時也

以酒渴愛江清作五小詩寄廖明略學士兼簡初和父主簿

詩中有將發沔鄂間之句

四休居士詩三首

十二月十九日夜中發鄂渚曉泊漢陽親舊攜酒追

送聊為短句

次韻陳榮緒同倚鍾樓晚望別後明日見寄之作

詩中有青草枯松之句皆岳州事蓋榮緒送山谷至岳尚未過湖也

過洞庭青草湖

過土山寨

按南行錄湖中有土山巡檢去黃陵廟十五里
晚泊長沙示秦處度范元實用寄明略和父韻五首

長沙即潭州在洞庭之南

次韻元實病目

右自洞庭青草湖至此詩蜀本載於明年今移
附於此

題李亮功家周昉畫美人琴阮圖

按高子勉記龍眠李亮功家藏周昉畫美人琴
阮圖兼有宮禁氣象旁有竹馬小兒欲折檻前
柳者亮功官長沙而山谷謫宜州過見之歎愛

彌日大書一詩於黃素上云云亮功名寅此
篇元載別集

題李亮功戴嵩牛圖

題和東坡先生題李亮功歸來圖

二詩蜀本詩集舊載於崇寧元年潯陽諸詩之
後今移附於此

次韻寄藍六在廣陵

再和寄藍六

寄懷藍六在延年

三詩元載外集詩中有傳聲為向揚州問相憶
猶能把酒不及追思二十年前會之句先生甲
子歲嘗寓揚州故附於此

文安國挽詞二首

因前篇有記夢詩故附於此

史天林中散挽詞

宋夫人挽詞

此二篇元載別集

崇寧三年甲申

先生是歲自潭州歷衡州永州全州靜江府

舊為以桂州

趨貶所

正月晦過衡山

先生有禮福巖寺思大師題名云正月甲辰按

長厯甲辰蓋晦日

三月己卯泊浯溪

見中興頌詩引三月己卯風雨中舟泊浯溪按
長厯己卯蓋初六日

十四日到永州

先生有與李樂道書云三月十四日到零陵不
肖本欲寄家桂林而家中堅欲相隨到貶所至
零陵已大熱骨肉不可復將行因盡室留零陵
零陵即永州

四月發全州是夏至宜州

先生有跋自書嬾瓚和尚歌後云四月辛未余將發清湘矣揚唐老乞書大暑天雨體煩眼花書不成字兼後注李資深書卷跋則是先生至宜在五月六月之間

十一月甲戌遷居子城南

先生跋資深書卷云崇寧三年十一月余謫處宜州半載矣官司謂余不當居闕城中乃以是月甲戌抱被入宿子城南予所僦舍喧寂齋雖

上雨旁風無有蓋障市聲喧憤人以為不堪其
憂余以為家本農桑使不從進士則田中廬舍
如是又可不堪其憂耶既設臥榻焚香而坐與
西隣屠牛之机相直為資深書此卷實用三錢
買雞毛筆書

十二月二十七日伯氏元明自永與唐次公俱來

先生乙酉家乘云正月庚午朔元明自永州與
唐次公俱來居四日矣家乘蓋先生日記按范

信中有乙酉家乘序云崇寧甲申秋余客建康
聞山谷先生謫居嶺表恨不識之遂泝大江歷
湓浦舍舟於洞庭取道荆湘以趨八桂至乙酉
三月十四日始達宜州寓宿崇寧寺翌日謁先
生於僦舍望之真謫仙人也於是忘其道塗之
勞亦不知瘴癘之可畏耳自此日奉杖屨至五
月七日同徙居於南樓圍碁誦書對榻夜語舉
酒浩歌跬步不相舍凡賓客往來親舊書信晦

明寒暑出入相居先生皆親筆以記其事名之
曰乙酉家乘而其字畫特妙嘗謂余他日北歸
當以此奉遺至九月先生忽以疾不起子弟無
一人在側獨余為經理其後事及蓋棺於南樓
之上方悲慟不能已所謂家乘者倉卒為人持
去至今思之以為恨也紹興癸丑歲有故人忽
錄以見寄不謂此書尚爾無恙耶讀之恍然幾
如隔世因鏤板以傳諸好事亦可以見先生雖

遷謫處憂患而未嘗戚戚也視韓退之柳子厚
有間矣東坡云御風騎氣與造物游信不虛語
哉甲寅四月望日蜀郡范寥信中序

長沙留別

此篇元載外集

勝業寺悅亭

按南行錄勝業寺在南嶽廟東屬潭州衡山縣
有柳子厚般舟和尚第二碑

離福巖

按南行錄福巖在南嶽依巖架空為之蓋思公道場有三生塔亦屬衡山縣

贈益陽成之主簿并引

引中云予之竄嶺南道出衡陽見主簿君益陽黃成之問宗派乃同世出祖兄也 此篇元載

別集

花光仲仁出蘇秦詩卷思兩國士不可復見開卷絕

嘆因花光為我作梅數枝及畫煙外遠山追少游
韻記卷末

花光寺在衡州經涂所作

題花光畫

題花光畫山水

所住堂

題高節亭邊山礬花二首并引

贈花光老

題花光為曾公卷作水邊梅

此三篇元載外集

贈惠洪

詩中有眼橫湘水暮之句

贈惠洪

此篇載外集曾端伯謂非先生所作王父亦嘗

刪去漫附於此

戲詠零陵李宗古居士家馴鷗鵠二首

零陵即永州經涂所作

李宗古出示謝李道人苕帚杖從蔣彥回乞葬地二
頌作二詩奉呈

書磨崖碑後

按先生有真蹟石刻題云崇寧三年己卯風雨
中來泊浯溪進士陶豫李格僧伯新道遵同至
中興頌崖下明日居士蔣大年石君豫太醫成
權及其姪逸僧守能志觀德清義明崇廣俱來

又明日蕭袞及其弟袞來三日袞回碑次請予
賦詩老矣豈復能文強作數語惜秦少游下世
不得此妙墨劉之崖石耳又按王仲言揮麈後
錄云崇寧三年太史赴宜州貶所是時外舅曾
空青坐鉤黨先徙是郡太史留連踰月極其歡
洽相予酬倡如江槎書事之類帥游浯溪觀中
興碑太史賦詩書姓名於左外祖急止之曰公
詩文一出即日傳播某方為流人豈可出郊公

又遂徙蔡元長當軸豈可不過為之防耶太史
從之但詩中言亦有文士相追隨蓋為外祖而
設空青即公卷名紆

浯溪圖

太平寺慈氏閣

元注晚與曾公卷同登

題淡山巖二首

明遠菴

去年三月清明蔣彥回喜太守監郡過其王芝園作
詩十六韻二侯皆有報章今年三月余至玉芝園記
錄一時次其舊韻

三月辛丑同徐靖國到愚溪過羅氏脩竹園入朝陽
洞蔣彥回陶介石僧崇廣及余子相步及余於朝
陽巖裏回水濱久之有白雲出洞中散漫洞口咫尺
欲不見介石請作五字記之

代書寄翠巖新禪師

詩中雖有早梅開之句不可作時節會也

戲答歐陽誠發奉議謝余送茶歌

到桂州

答許覺之惠桂花椰子茶盃二首

覺之名彥先

以椰子茶瓶寄上德孺二首

寄黃龍清老三首

詩中有中秋月之句秋時所作

贈法輪齊公

法輪即南嶽岫嶁峯龍雲寺先生有重書法輪
古碑跋云大明本名惠遠思大禪師之孫與虞
世南李百藥岑文本為方外之友三人皆為作
碑銘韋岑中書之文僅存又為不解事僧傳於
石刻敗剝之幾不可讀矣而法輪寺住持禪師
景齊來求予刊定且乞書而刊之師金陵蔣山
中人嘗入予方外之師晦堂心公之室謂我為

同門蓋嘗參字說於王荊公其人通達辨識欲有所為人不能泥也故欣然為之書法輪寺自晉至唐貞觀中雖既廢復興皆號龍雲寺中間改號金輪而無文記可尋意武后時所改耳其號法輪則太平興國五年敕書也崇寧三年二月丙寅脩水黃庭堅書今以歲月附見 此詩元載別集

崇寧四年乙酉

先生是歲在宜州

二月六日與諸人飲餞元明於十八里津

見乙酉家乘又二十六日得元明二十四日丁

卯書寄詩一篇青玉案一篇

三月十五日成都范寥來相訪

寥字信中見乙酉家乘

五月初七日癸卯自此宿南樓范信中同之

見乙酉家乘又先生有題東坡小字兩軸云崇

寧四年五月丙午觀於宜州南樓按誠齋先生
楊公萬里嘗作宜州山谷先生祠堂記云予去
年十月致書桂林伯侍講張公今乃得報且委
予曰宜州太守韓侯璧直諒士也初抵官下他
皆未遑首新山谷先生祠堂蓋山谷之貶宜州
崇寧甲申也館於城之戍樓曰小南門者明年
卒焉後人思之即其地廟祀之於湖張安國大
書豫章先生四字以揚之然居向湫隘屋廬壞

隕俎不成列拜靡厝躬今侯戾止顧瞻而賓爰
出其闥距城不遐得地洵盱湖光前陳曠野洞
開諸峯崛竒駿奔來庭立屋六楹以妥神居刻
木肖象是似是享俯湖為閣于登于臨湖山清
空雲煙高寒神則降集人士奮豫既成來求閣
名若記拭既以清風名閣矣字學詩山谷者微
子莫宜記之予執書歎曰予聞山谷之始至宜
州也有毗某氏館之太守抵之罪有浮屠某氏

館之又抵之罪有逆旅某氏館之又抵之罪館
於戍樓蓋園之也卒於所館蓋飢寒之也先生
之貶得罪於時宰也亦得罪於太守乎鹿之肉
人之食君子之殘小人之資也孰使先生之所
挾足以授小人之資也哉夫豈不得罪於太守
也先生得罪於太守則太守不得罪於時宰矣
豈惟不得罪也又將取榮焉由今視之其取榮
於當時者幾何而先生饑寒窮死之地今乃為

騷人文士佇瞻鑽仰之場來者思而去者懷而
所謂太守者猶有臭焉則君子之於小人患不
得罪爾得罪奚患哉今韓侯之賢乃能社先生
而稷之惜也先生之前乎韓侯也先生之沒侯
猶敬之如此使其生也遇侯而嗅休之則主賓
之賢牽聯俱傳也惜也韓侯之後乎先生也然
士或同室而睽或異世而逢苟逢矣前後足校
哉先生之祠要自韓侯始則韓之傳決也而又

得侍講張公名其閣其傳益決也因書其說寄侍講以遺韓侯云今附於遷居南樓之後

六月辛巳游龍隱洞

先生有龍水城南帖云邵彥明置酒招余及華陽范信中龍城歐陽佃夫約清旦會於龍隱洞余三人借馬自南樓來至則彥明及其弟彥昇在焉云云彥明者臨淮邵華彥昇兄也信中名寥佃夫名襄余者江西之修水黃庭堅魯直時

崇寧四年六月辛巳

予去歲在長沙數與處元實相從把酒自過嶺來
不復有此樂感歎之餘戲成一絕

處度名湛元實名溫此篇元載別集今附是歲
宜陽別元明用觴字韻

元明留別

此篇元載外集

信中遠來相訪且致今歲新茗又在任道寄佳篇

復次韻呈信中兼簡任道

此篇元載別集

和范信中寓居崇寧遇雨二首

按蜀本詩集注云此詩亦四年夏所作

乞鍾乳於曾公卷

按蜀本詩集注云豫章後集有與公卷書云鍾乳何時再成又云嶺南秋暑殊未解此詩蓋秋時所作或遂絕筆於此篇歟

九月三十日先生卒


按國史九月五日奉御筆手詔元祐姦黨詆訕
先帝罪在不赦曩屈臺憲貸與之生斥之遠方
固無還理終身貶所豈不為宜今先烈紹興年
穀豐稔鑄鼎以安廟社作樂以協神民嘉祥荐
臻和氣昭格肆頒赦宥覃及萬方興言邦誣久
責遐裔一夫失所朕尚惻然用示至仁稍從內
徙服我寬德其草爾心應姦黨羈管編配安置

居住在廣南者與移荆湖南北在荆湖者移江
淮其餘並移近裏惟不得至四輔畿內後批崇
寧元年九月十六日送進奏院遍牒行下明年
正月庚戌劉摯而下叙復有差先生在輕第二
等之首並叙復令吏部與監廟差遣而先生皆
不及拜命故先生本傳云三年徙永州未聞命
而卒紹興初高宗皇帝中興特贈先生直龍圖
閣官子孫各一人二年先祖尚書以給事中召

至行在營家藏先祖親筆日記載二月初六日
戊辰後殿引對天語甚溫詢先生子孫曲折許
它日召至行在及十七日己卯午刻中使鄭謐
傳宣至先祖遂就省中見之上令問先生諸孫
曲折先祖即因謐付口回奏當時特贈實與張
耒晁補之秦觀四人同命詞云敕故朝奉郎黃
庭堅等自熙寧大臣用事變法始以異用排斥
士大夫維我神祖念之不忘元豐之末稍稍收

召接於元祐英俊盈朝而爾四人以文采風流
為一時冠學者欣慕之及繼述之論起黨籍之
禁行而爾四人每為罪首則學者以其言為諱
自是以來縉紳道喪綱紀日隳馴致宣和之亂
言之可為痛心肆朕纂承既從昭洗今爾四人
復加褒贈斯足以見朕志矣嗚呼西清之遊書
殿之選惟爾曹為稱使生而得用能盡其才亦
何止於是歟舉以追命聊申齋志之恨亦以少

慰天下士大夫之心英爽不亡歆此休顯蓋詞
臣推廣高廟聖意及之後之子孫伏讀褒訓銜
戴國恩欲報無路何但痛哭流涕而已因輒附
諸篇末



山谷年譜卷三十